

OHR: Parlamentarci moraju objasniti na koji način dugovanja po osnovu stare devizne štednje mogu biti isplaćena ranije

Ured visokog predstavnika (OHR) poziva parlamentarce da objasne kako si Bosna i Hercegovina može priuštiti izmjene i dopune Zakona o izmirenju obaveza po osnovu računa stare devizne štednje, koje je jučer usvojio Zastupnički dom Parlamenta BiH.

OHR želi da nosiocima stare devizne štednje novac bude vraćen što je prije moguće. Međutim, OHR je također zabrinut da će ovi amandmani – kojima se period isplate potraživanja smanjuje sa trinaest na pet godina dok se kamatna stopa za utvrđeni period povećava – preopteretiti javne finansije u Bosni i Hercegovini.

OHR također podsjeća da je Vijeće ministara BiH, u svome mišljenju od 21. jula 2006. godine, zaključilo da bi predloženi amandmani stavili nepodnošljiv teret na javne finansije u BiH i ugrozili isplate dugovanja štedišama čiji su računi zamrznuti 1991. godine.

Zapravo, tako nerealan plan znači da je veća vjerovatnoća da će vlasnici stare devizne štednje ostati bez ičega, nego da će im novac biti vraćen za pet godina.

Međunarodni monetarni fond također je upozorio da bi neodgovorno trošenje sredstava u predizbornom periodu moglo dovesti do glavobolja u post-izbornoj fazi, kada će organi vlasti biti prisiljeni da ukidaju programe i usluge zbog nedostatka finansijskih sredstava.

OHR poziva članove Parlamenta da adekvatno i detaljno razmotre finansijske implikacije ovih amandmana, prije konačnog glasanja o zakonu.

Ako je cilj ovih amandmana da osiguraju dugoročnu korist nosiocima stare devizne štednje a ne predizborna kampanja, onda bi njihovi zagovarači trebali moći objasniti kako planiraju finansirati ovaj zakon i kakve će to posljedice imati na druge vidove državnih, entitetskih i kantonalnih potrošnje.

Vlasnici stare devizne štednje zaslužuju da dobiju nazad svoj novac. Ne zaslužuju lažna obećanja u predizbornom periodu.